

երգել... Դիցուք թե անգիր արեցիր, բայց ծայնը որտեղի՞ց կբերես... Իմ մեջ առաջույն յիշողութիւնը չէ մնացել. ես դեռ աշակերտ եղած ժամանակ Զոմե-րոսից եւ Վիրգիլիոսից ամբողջ գլուխներ անգիր գիտէի, բայց հիմա դժուարանում եմ մի քանի աղօթքներ անգիր սերտել...

Հազը դարձեալ սկսեց: Ասլանը ուշադրութեամբ լսում էր: Իմ ուշադրութիւնը նոյնպէս գրաւեց Նրա բողոքը, որի մեջ այնքան մաղծ եւ դառնութիւն կար, որքան մեծ յօժարութիւն՝ նոիրոած լինելու եկեղեցու սպասաւորութեանը: Նա շարունակեց.

— Դատապարտելին այն չէ, որ ձեռնադրող եպիսկոպոսը մեզանից պահանջում է այն, ինչ որ կը պահանջէր մի անգրագետ տիրացոյից, դատապարտելին այն է, որ ժողովուրդն էլ հենց այդ է պահանջում: Նրա համար պէտք է գիտենալ ամբողջ այսմաւորքը, ամբողջ հարանց վարքը... Նրա համար պէտք է գիտենալ, թե ինչպէս տէր Զուսկան որդին տեսաւ իր առջեւ արեան ծովը, թե որտեղ Յովնան մարգարէն դուրս եկաւ ձկան փորից, կամ ինչպէս զռաց Բաղաամի էշը... Այդ բոլորը պէտք է գիտենալ, բայց մենք այդ բաները չենք սովորել...

Նրա սեղանի վրայ դրոած էր մի բաժակ կաթ, նա վեր առեց եւ կոկորդը զովացրեց: Ասլանը դիմեց նրան բժշկի հարցով.

— Այժմ ինչպե՞ս եք զգում ձեզ:

— Այժմ այնքան վատ չեմ... այստեղ օդը բաւական կազդուրեց ինձ... — ասաց նա՝ կաթի բաժակը ցած դնելով: — Բայց ձեզ, իբրեւ բժշկի, պէտք է աւելի հասկանալի լինի, որ ես կարօտ եմ սնունդի, եւ լաւ սնունդի, որից զրկուած եմ այստեղ... Պէտք է պաս պահել, պէտք է ենթարկուել վանական բոլոր կանոններին, իսկ դրանք սաստկացնում են իմ հիւանդութիւնը...

— Չէ՞ք մտածում թողնել վանքը: Ես ձեզ խորհուրդ կը տայի թողնել:

— Ոչ, մի անգամ որ սկսել եմ, պէտք է վերջացնեմ...

— Թոյլ տո՞ւք քննել ձեր կուրծքը:

— Ի՞նչ քննել, ես գիտեմ այնտեղ ի՞նչ է կատարւում...

Հազը, որ աւելի սաստկութեամբ սկսեց այժմ, ստուգեց, թե ի՞նչ էր կատարւում այնտեղ...

Ասլանը աշխատում էր չխօսեցնել նրան, որովհետեւ նկատում էր, թե որքան տանջւում էր նա խօսելու ժամանակ: Բայց նա ցանկանում էր խօսել եւ միշտ խօսել, կարծես երկար ժամանակ չէր խօսացել: